

Carum Perkeso jika sayang keluarga

FOTO: MOHD HALIM ABDUL WAHID

Jangan anggap carum Perkeso sebagai beban, jadikan iktibar nahas libatkan penghantar makanan baru-baru ini

Oleh **NORAFIZA JAAFAR**
KLANG

“Jika sayang keluarga, isteri, anak-anak dan ibu bapa, jangan anggap caruman Pertubuhan Keselamatan Sosial (Perkeso) sebagai satu beban,” kata Ketua Eksekutif Perkeso, Datuk Seri Dr Mohammed Azman Aziz Mohammed.

Beliau berkata, kemalangan melibatkan penghantar makanan, Muhaimin Said, 34, yang maut, manakala seorang lagi penghantar, Muhammad Nazrul Mohd Nadzri, 29 cedera parah dirempuh kenderaan utiliti sukan (SUV) dalam kejadian di Jalan Haji Sirat, Meru 3

September lalu perlu dijadikan iktibar.


Menurutnya, Allahyarham Muhaimin sempat mendaftar di bawah Akta Keselamatan Sosial Pekerja 1969 (Akta 4) dan Akta 789 Skim Keselamatan Sosial Pekerjaan Sendiri (SKSPS) yang melayakkan balu, Nur Izwana Othman, 26, menerima bantuan pencen penakat.

“Dengan kesedaran yang ada pada arwah untuk mencarum RM46.60, membolehkannya mendapat faedah bagi Akta 789.

“Seorang lagi mangsa, Muhammad Nazrul yang cedera parah di kedua-dua belah kakinya didapati tidak mendaftar dan mencarum, menyebabkannya tidak layak dibayar sebarang pampasan,” katanya pada sesi penyerahan faedah Perkeso kepada waris Allahyarham Muhaimin di Jalan Haji Musran Rantau Panjang di sini pada Isnin.

Turut hadir, Presiden Persatuan Penghantar P-Hailing Malaysia, Izad Raya serta Ketua Komunikasi dan Hal Ehwal Korporat Perkeso, Ismail Abi Hashim.

Pada program itu, Mohammed Azman menziarahi Nur Izwana dan ibu arwah, Zailan Soid, 73, serta menyampaikan bawcar bayaran faedah yang layak diterima.



Mohammed Azman Aziz (kanan) menyerahkan faedah Perkeso kepada Nur Izwana (dua dari kiri) dalam satu majlis ringkas di kediaman keluarganya di Rantau Panjang pada Isnin.

Balu arwah layak menerima pencen penakat RM882.98 sebulan yang dibayar secara berkala sepanjang hayat.

Selain itu, balu arwah juga layak menerima Faedah Orang Tanggungan (FOT) berjumlah RM837 sebulan yang akan dibayar seumur hidup dan faedah pengurusan mayat RM2,000.

Mohammed Azman berkata, 175,000 pemandu penghantar p-hailing telah berdaftar dengan Perkeso setakat ini.

Justeru, beliau menggesa mereka yang bekerja sendiri untuk tampil mendaftar dan mencarum di bawah SKSPS bagi perlindungan diri serta kebajikan keluarga.